

【路燈下个蟾蜍】邱一帆原作

今晡暗晡就像往日共樣，食飽夜<sup>1</sup>就想行到屋面前，啖幾口仔清清个空氣，分正食飽个暈暈个腦筋清醒；順續仔，看幾眼仔屋脣菜園自家種个青菜，分自家有一息息仔成就感！這種習慣，毋知哪央時就養成个？反正，係到該時，就想打開大門，行往出<sup>2</sup>！

行到屋前，看著光光个路燈四圍，有一大群个水蟻仔，對等電火飛來飛去、飛上飛下。水蟻仔，就好<sup>3</sup>在落雨過後翕熱个暗晡頭飛出來，無就好在落雨之前翕熱个天時走出來。隔壁个阿伯、伯姆，係看著水蟻仔，就知愛落大雨哩！看該群水蟻仔在電火脣飛，有兜飛恹飛瘵抑係羽翼著傷，失忒平衡，就會跌到路燈下，飛又飛毋走，走又走毋贏。

就在路燈下、大路項，佢實在毋敢相信吾目珠看著个！一、二、三、四、五、六、七、八，總共有八隻、八隻蟾蜍，就在屋面前个大路項。佢當久當久毋識看著恁多蟾蜍，佢話著吾目珠有問題，就

遽遽喊吾舖娘行出屋下來看，啊喔！毋會差，確確係<sup>4</sup>！正想講該蟾蜍係毋係跳出大路項來奈涼<sup>5</sup>，就看著蟾蜍邊脣有該兜飛又飛毋走，走又走毋贏个大水蟻。

八隻蟾蜍，在八個絡食个位跡尋食，舌嫵西出西入先食頭前飛毋停動个大水蟻！再緊跳緊逐脣口該兜飛毋走、走毋贏个大水蟻<sup>6</sup>。過無點半鐘，電火脣个水蟻仔緊來緊少，路燈下个水蟻仔七分蟾蜍食到淨淨。佢看著該八隻蟾蜍還係企在大路項，等等頂高个水蟻仔跌下來，佢恬恬仔行過去，佢兜無發覺，無跳走！係講車仔駛過來，佢兜係毋知好閃，驚怕會同佢兜輾到綿綿<sup>7</sup>，腸肚就洩出來喔！

好得，差毋多兩點鐘个時間，無一臺車仔駛過屋前這條路，無一隻蟾蜍分車仔輾著，該載喔！八隻蟾蜍食到飽飽，跳轉菜園肚項去哩！

<sup>1</sup> 食飽夜：音 siid bau` ia；吃飽晚飯。

<sup>2</sup> 行往出：音 hang` gong` cud`；向外走出去。

<sup>3</sup> 就好：音 qiu hau；就喜歡。

<sup>4</sup> 確確係：音 kog` kog` he；確定是。

<sup>5</sup> 奈涼：音 liau liong`；乘涼。

<sup>6</sup> 大水蟻：音 tai sui` ngie；一種有翅的白蟻。

<sup>7</sup> 綿綿：音 mien` mien`；稀爛。